

Gīvouk, Žemaitējē

Ēš Vēlniaus vīkdams to link jūras,
Atrasi Žemaitējē –
Napaprasta ton graži krašta,
Darbštiūm žmuoniūm bēndrējē.

Če – vēinē kalnā ē pakalnēs,
Ē mēškūm če – galībē !
Pri kuožnuos truobuos aki džiogins
Gražiūm gieliūm gausībē.

So žemaitio pasērokavēs,
Būda anuo soprāsi,
Napaprasta ē gērašērdi
Krūtēnie anou rasi.

Pajosi dūšēs ton platoma,
Napaprasta kontrībē,
Ēaugusi par omžius kraujie
Ton dvāsēnē tvērtībē...

Daug kas miegēna anon ēngtē,
Ož spronda žemīn spaudē –
Ons, dontis grēiždams, kumstēs spaudē
Ē švēisiūm dēinūm laukē.

Šēndēina viel, veiziek, darboujēs,
Ronkuovēs atsēraitēs,
Krūtēnē viejou atlapuojēs,
Dainiou viel laisvēs daina:

Gīvouk, Žemaitējē,
Gīvouk omžēnā!
Klestiekēt, žemaitē,
Tuo žemie ēlgā!

Če gīmsť ē aug jau naujēs kartas
Ont Baltėjēs pakrontēs
Ē laigo nieks ni napamēslēj
Ēš naujē mūsa poltē.

Pavierīkēt, aš garēntoujo –
Kas būs ē kas nabūs,
Bet... ŽEMAITĒJĒ ē žemaitē
Par omžius napražūs !

Gīvouk, Žemaitėjē,
Gīvouk omžēnā!
Klestiekēt, žemaitē,
Šiuo žemie ēlgā!